

ESTD: October 1994
THLA TIN CHHUAK CHANCHINBU
Kum khat lâk man ₹50

JULY 2023
Postal Registration No. MZR/70/2021-2023
RNI Registration No. 66996/96

Kristian Naupang



Vol. 28 Issue No. 343

HSLC TOPPER 2023
Cynthia Lalhlupui Shangpliang



Sairâng Dinthar Kohran Tleirâwl Chawhnu Inkhâwm

• RAM ENTHLATU • KRISTIAN CHHÛNGKUA
• PIANSUALIN TLAI LUAT A NEI LO • JET ENGINE

Kum 28-na

July 2023

Vol. 28 Issue No. 343

Editor

Rinsailovi

Managing Editor

Rev. Lalbiaknia

Joint Editors

Upa Neihthanglunga

F. Vanlalrochana

Zohmangaiha

Eric Lalnunmawia

Circulation Manager

Lalremmawia, Ph: 9862374560

Kristian **Naupang**

Synod Office, Second Floor

Mission Vèng, Aizàwl - 796001

Phone: 0389-2324590

email: kristiannaupang@gmail.com

A man pe duh leh a bu la duh chuan

Circulation Manager hriatir tûr a ni.

Kum khat lâk man ₹50

Kristian Naupang thu chhuabte hi Editor ngaih dan a ni vek kher lo.

A chungah thu awmte

Phêk

1. Editorial 1
2. Kristian Chhôngkua 2
3. Interview 5
4. Ka thian rualbanlo Buata 10
5. Wrestler Ropui The Undertaker Lal Isua hnênah a lo kîr 12
6. Piansualin tlai luat a nei Lo 15
7. Tleirâwlte mamawh Krista 18
8. Ram enthlatu 20
9. Naupang tête chhandamna thu hrilto an ni thei 23
10. An chanchin-Vaivakâwn Kohhran NPSS 24
11. Hriatzauna 27
12. Hmutheitua 29
13. Quiz 30
14. Chei rawh le 31
17. Ka hmuh ang hmu thei rawh 32



Inkhâwmnaa kan awm dân hi

Mihring zia pakhat chu kan awm tamna leh chêt tlat ngunna deuhah hi chuan kan tlângnêl êm êm thîn a, chumi hmun leh kan thiltih te chu ngaiyah kan lo nei ve mai thîn.

Tlângnêl a thạt laiin tlêngnêl lutuk a awm thei a, ngaiya neihna hian inthlahdahna a keng tel duh viau bawk. Hei hi inkhâwmnaa kan chêt dânah hian a lang duh viau mai.

Pathian Biak Ina kan inkhâwmnaah tlai taka kal te, nui vur vur, inbe reng mai leh inkhâwm chhông zawnga mobile phone khawih hmuh tûr kan awm fo mai hi thil thà lo leh mawi lo tak a ni. Kristian naupang zîngah ngei pawh hetiang tih chîng kan awm thîn hi a zahthlâk hle a ni. Pathian zah lohna a nih bâkah mahni intihmualphona nasa tak a ni a.

Inkhâwm hun chhông hi dârkâr khat aiin a rei ngai meuh lo va, hemi chhông takngial pawh kan insûm zo lo a nih chuan Kristian naupang thà kan ni thei lo vang. Kan Pathian hi a ropuiin a thianghlim a, zah takin kan be tûr a ni. Amah kan biakna in pawh hi a thianghlim a, kan Pathian biak in chhôngah chuan mawi takin kan awm tûr a ni tih i hre thar ang u.

Kristian Chhûngkua

Lallawmkimi Tochwawng
Intermediate Dept., Champhai Vengsang

Hmânlai hian
hmeichhe naupang
pahnih hi an awm a, an
hming chu Siamtei leh
Puii an ni. An têt deuh lai
chuan an inkâwm nasa hle
a. Mahse, sikul lût rual an
nih meuh chuan an sikul luhna te a inan loh avângin an
inkâwm thei ta lo.



Siamtei te hi chhûngkaw harsa ve tak an ni a,
a nu leh pa te hi ni tin inhlawh ve thîn an ni.
Chhûngkaw harsa tak ni mah se Pathian thu an âwih
êm êm a, chhûng inkhâwm te an hmang ziah thîn.
Siamtei hi rilru chak lo tak ni mah se lehkha a zir

taima êm êm a; mahse, top
5-ah a lang pha ve tawk thîn
a ni.



Naupang thu âwih leh fel tak
a nih avângin lehkha a zir
dâwnin Bible chhiarin a
tawngtai thîn a, chu chuan
a zirnaah nasa takin a pui a

ni. A nu leh paten hna an thawh hlân te hian thahnemngai takin a tih theih ang ang te a lo ti a, ei rawngbâwl leh in chhông tihfai leh enkawl chu a chhôngte a lo âwl ve theih dân a ni tih hriain a theih tâwkin a lo ti ve thîn a ni. A zirna chu chhunzawm ve zêlin tha takin a pass chho ve zêl a. A zir taihmâkna avâng chuan zirtûrtu hna chelhin an chhôngkua chu mi awm thei pângngai takah a siam ta a ni.

Puii erawh chu Primary Sikul a kal lai chuan pakhatna lo ni ve thîn mah se, a taihmâk loh avângin a lo len deuh chuan eng mah a ni ta lo a. A pa hi officer lian tak a ni a, a nu chuan dawr lian tak an ta ngei a nghâk a. An lo hausak tâkah chuan a neihtûrtu Pathian pawh an hre ta meuh lo.

Puii chuan a siamtu a theihnghilh ta emaw tih mai tûr hian thawngtai leh Bible chhiar takngial pawh a ti ve ngai lo. Chhông inkhâwm an neih ve ngai loh avângin Lalpa thawngtaina pawh a thiam mumal lo va. Smart phone leh nawmchenna avâng chuan a nun chu a chhe zo vek a ni. A duh duh a neih theih avângin lehkha pawh a zir peih lo va. Awmpui an neih avângin ei rawngbâwl leh thil



tih fel leh enkawl a thiam lo va. A lo puitlin ve chuan pâwl sâwm pawh a pass loh avâng chuan eng mah hna pawh a nei lo va, a inchnîr chuan eng mah a sâwt tawh lo va, a tân chuan dam chhan a awm ta lo a nih ber chu. A dam chhûng a tawi êm êm a, kum 23 mi a nih chuan chatuan ram a pan ta a ni.

Hêng thawnthu pahnih ațanga kan zir chhuah tûr chu Kristian Chhûngkaw din pawimawhzia leh thatzia a ni. Ngun takin ngaihtuah teh, Siamtei mi hlawhtling a nih theih chhan leh Puii naupang tea a thih chhan te, a nun khawloh chhante hi. Siamtei chu a naupan laia a nu leh paten thu ța leh Pathian thua an fuih ținna te hi a nun kaihruaitu a lo ni ta a. Puii erawh chu a nu leh pate ațanga thu ța leh awm dân mawi a hriat ve ngai loh avângin a nun a chhia a nih kha. No. 4 leh zu, ruih theih thil chi hrang hrang a ti a, a dam reipui thei ta lo.

Kristian chhûngkua i din lo a nih chuan i in chhûng kha a hlim ngai lo ang a, nangmah leh i chhûngkaw tân a pawî zâwk dâwn a ni tih hre reng la. Lalpa chên lohna chhûngkua ni lo la, ani chên theihna tûr chhûngkua ni zâwk ang che u.



*Interview***CYNTHIA LALHLUPUII SHANGPLIANG KAWMNA**

Tûn ÷umah hian Mizoram Board of School Education hnuaia High School Leaving Certificate (HSLC) 2023 result chhuaka pakhatna Cynthia Lalhlupuii Shangpliang kawmna kan târ lang dâwn a, chhiartuten an chanchin aţang hian entawn tûr kan neih ngei ka beisei a. Uluk deuhin kan chhiar ang a, anmahni ang kan ni ve thei a ni tih kan rilruah tuh ngheh tlat kan tum dâwn nia.

(Editor = Ed. Cynthia Lalhlupuii Shangpliang = Cynthia)

Ed: A hmasa berin in chhûngkaw chanchin min hrilh phawt la.

Cynthia: Ka pa hming chu K. Shangpliang a ni a, ka nu hi Zonunthari a ni. Unau pali kan ni a, u mipa pathum ka nei a, kei hi a naupang ber leh hmeichhe awm chhun ka ni a. Falkland Vênga awm kan ni.

Ed: School i luh tîr aţanga i kalna te min hrilh la, a thiam pâwl nge i nih a, a vântlâng tih te?

Cynthia: KG I leh Class 5 St. Mary's School, Electric Vêngah ka kal a, Class 6 aţanga Class 8 thleng Mary Mount School, Tlângnuamah kalin Class 9&10 chu St. Paul's School-ah ka kal a ni. Pathian zârah ka têt lai aţangin a thiam pâwl chu ka ni ve ÷hîn.

Ed: I têt lai pawhin lehkha chu i thiam thei hle mai. I nu leh pate pawhin an chhuang ngawt chein ka ring a ni. A nih leh i lehkha zir dân min hrilh la, ni khatah chawh rualin dârkâr eng zât nge i zir ÷hîn?

Cynthia: Lehkha hi School kal lai hi chuan darkâr li vêl ka zir thîn a. Ka zir tûr ruahman ka zawh hma dân azirin hun ka hmang thîn a. School chawlh lai erawh chuan nilêngin ka zir thîn.

Ed: Hetiang dinhmun a i lo awm tâkah hian lehkha i thiam theih vâng hrim hrima thleng nge nia i inhriat, i zir peih vâng?

Cynthia: Pathian zârah thiam thei ve angreng tho mah ila, zir peihna tel lo chuan he dinhmun hi ka thleng chuang lo vang.

Ed: A lâwmawm hle mai, i thiam thei baw k a, i thawk rim baw k a. Dinhmun sâng tak thleng tûrin ka duhsak che a ni. A nih leh lehkha i zir dânin i ÷awngtai ngai em? Bible te i chhiar thîn em?

Cynthia: Lehkha ka zir hma hian ÷ha taka ka zir theih nân leh ka thiam theih nân ka ÷awngtai thîn. Bible chhiar hi chu zânah mut hma hian ka duh tâwka tam ka chhiar thîn.

Ed: Nangma inhriat dânin pi leh pu leh nu leh pa thu âwih i inti em?

Cynthia: Ka theih ang tâwk chuan âwih ve ka tum na a, thu âwih lova luhlul tlat châng hi a awm ve a. Chûng thu âwih lova luhlul tlat lai chu ka inchhîr lai berte an ni fo baw k.

Ed: A lâwmawm hle mai. Pi leh pu leh nu leh pa thu âwih hi dam reina a nih bâkah hlawhtlinna a ni tih hi hriat reng tûr a nia. Ti daih ila, thian hi i ngaina em? I zirna tibuai khawpin thian i kâwm ngai em?

Cynthia: Aw, thian hi ka ngaina êm êm a. Mahse, ka nu leh pate hian ka zirna tibuai khawpin eng mah tih an phal lo va; chuvângin, ka zirna tihbua ai mah chuan zir tûr hian ka infuih nasa a, a tûl chuan ka hau a, anmahni pawhin min hau thîn bawk. Zir tûr hian kan infuih tawn nasa êm êm a ni,.

Ed : A nih leh school-ah zirtirtute hauh ngaiin i awm tawh em?

Cynthia: Ka têt lei kha chuan awm ve tawh a. Tûn hnaiah erawh chuan hauh ngai lo tûrin kan fîmkhur ve.

Ed : A nih leh topper nih hi i lo inring lâwk rêng em? Nge, i beisei aia sângah i awm?

Cynthia: Beisei aia sâng daih a ni. Topper ber kher hi chu inrin a har a, Pathian malsâwmna avâng liau liaua he dinhmuna ding thei chauh niin ka inhria.

Ed : Nangma pualin mobile phone i nei tawh em? FB, IG, etc. account i nei ve tawh em? I neih tawh chuan chûng thil chuan i zirna a tibuaiin i hria em?

Cynthia: Mahni pualin phone ka nei lo, ka nu leh pa te ta hi ka hman duh chângin ka hmansak thîn a. FB, IG leh Social Media hi ka khawih vak lo, whatsapp hi ka khawih ve thîn.

Ed : Zirlai thenkhat chuan mobile phone te tângkai taka an hman laiin, thenkhat chuan an chhiat phah bawk a. Nang chu a hmang tângkai pâwlah i awm zêl ka ring tlat a, ka duhsak bawk che a ni. Hetia topper i han nih takah hian nangmahah nghawng a nei ngeiin ka ring a, i rilrua lo lût hmasa leh he i dinhmun avâng hian eng nge i rilruah lian ber?

Cynthia: Pathian thatzia leh ka chung a felzia hi ka rilruah a lian êm êm a, ka ngaihtuah hmasak ber pawh a ni. Tin, nu leh pa, ka ute leh ka chhûngte bâkah min thawnghaipuitute an lâwmna kha result ka hriat veleh ka ngaihtuah a ni.

Ed : Sunday School i kal thîn ngei ang a, kaikim lâwmman (medal) emaw, exam-na ti tha lâwmman emaw i dawng tawh em?

Cynthia: Hripui avânga inkharhkip hma kha chuan kai kim lâwmman leh exam lâwmman ka dawng thîn.

Ed : I hma hun atâna i inruahman dân te min hrilh la, eng nge nih i tum a, i zir leh zêlna tûr lam te.

Cynthia: Pathianin rem a tih chuan St. Paul's-ah Science subject lâk chhoh ka tum a. NEET exam beih a, medical line-a graduate zawhah Civil Service lamah lûtin, IAS nih ka tum a ni.

Ed : I lehkha zirna kawngah i chhûngten an thapui thîn che em? Nge, mahniin i zir ve tawp mai?

Cynthia: Ka lehkha zirnaah hian ka chhûngte hian min pui nasa êm êm a. Ka nu leh pate pawh hian ka zir peih loh deuh chuan min zilh nasa thîn hle a. Ka u Simona phei hi chuan a thil thiam leh zir dân zawng zawng min hrilh chhâwng thîn a. Tin, ka exam lai leh class 10 ka kal lai khân in chhûng hna zawng zawng min âwl a. Zir ngawr ngawra rilru hah loh nân thil nuam tak tak min tihpui thîn a, ka theih tâwp chhuaha rilru nuam taka exam ka hmachhawn theih nân an thang hle a ni.

Ed: Zirna piah lam han inzâwt ila. Thlarau lam nun i ngai

pawimawh hlein kan lo hria a, a dik rêng em?

Cynthia: Aw, ka thlarau lam nun leh Pathian hmangaihna aia pawimawh tih hi ka nei lo. Kawng engkimah Pathian duh zâwnga tih hi ka chakna ber a ni tih hi ka hre Chiang êm êm a ni.

Ed : A tâwp nân he chanchinbu lo chhiartute hian eng angin nge hre reng che sela i duh min hrilh la, an hnêna sawi duh i neih apiang sawi tel bawk la.

Cynthia: Ahmasa berah chuan Pathian hnaih hi a pawimawh êm êm a. Kan nuna kan thil tih zawng zawng hi ama tân leh a ram zauh nâna ti tûrin chhiartute ka fuih duh a. Tin, Kristian naupang tân chuan kan nu leh pate kan theih ang tâwka chawimawi hi kan tum ber tûr a ni. Leia kan Pathian te an nih avâng leh min enkawlna zawng zawng avângin kan nu leh pate hmangaih lêt ve hi kan tih ngei ngei tûr a ni.

Tin, thian kawmah fîmkhur hi a tûl a, social media leh phone khawih nasat hi a pawî êm êm bawk a, kan zirna lamah mai ni lovin Pathian nêna kan inlaichîna hi tûnlai khawvêl hnaih lutuk hian a tihbuai thîn vâng a ni.

A tâwp berah chuan, “In tih apiangah mihring rawng bâwl ang ni lovin, Lalpa rawngbâwl ang zâwkin, tih tak zetin ti ang che u,” (Kol 3:23) tih hi hre rengin, zir laite tân a bîkin zirna lam lo tui lutuk lo pawh ni mah îla, zir thei dinhmuna Pathianin min dah tawh chuan kan theih tâwka zir hi kan tih tûr a ni a. Nakinah inçhîr lehna tûr neih ai chuan hun tha hman tângkai hi kan tih tûr a ni.

Ka ðhian rualbanlo Buata

Engkima Chawngthu
Vaivakawn Vengthlang

Ka thianpa chanchin aþang hian rualbanlote leh rualbanlo enkawl lai mêk neiten zir tûr kan neih ngei ka beisei. Ka ðhianpa Lalbuatsaiha hi pian tirha mitdel a ni a, Keifâng khuua awm a ni a. Buata hian Govt. Kolasib College aþangin BA Pol.Sc. Honours a zo va, hemi hnu hian Delhi-ah JMI (Jamia University) aþangin MA (Pol. Sc.) a zo leh a, Mizo zînga MA pass hmasa ber a ni. JNU aþangin M.Phil a zo leh bawk.

Buata hi mi tumruh leh paukhauh tak mai a ni a. An unau zînga naupang ber ni mah se a nu leh pa hmuh phâk lohah hmun hla takah awmin harsatna tam tak a pal tlang chho a ni. BA a zirlai khân sâp ðawnga word a hriat loh apiang a chhinchhiah a, chu chu dictionary-ah mit vârte a zawntûr a, a bye heart ngat ngat ðhîn. Vai rama lehkha a zir lai pawhin nasa takin mitdelte hamþhatna leh an dawn tûr ang te amah hian a nawr chhuakin a buaipui ðhîn a ni.

Buata hi hnam dang kârah pawh zahpuiawm lo khawpa mahni inhai kaw chi a ni a. JNU Visually Challenge Student (Blind) Forum-ah hotu ber (Convener) dinhmun hial chelh phain JNU Christian Fellowship-ah hruaitu (Prayer Secretary leh Group

Leader) te a lo chelh tawh bawk. Tûnah hian Volunteer for the Blind Foundation, New Delhi-ah National Member and North East In charge a ni tawh a, Mizoram Blind Society-ah Sr. Adviser niin a tawn hriat aţang hian mitdelte harsatna sut kianna tûr leh an hmakhua atân nasa takin a ţanpui mêk zêl a ni.

Ka ţhianpa Buata hian mahni inkhawngaihna leh a lunghnûr zâwngin thil a la ve ngai lo. Huaisen takin thil tam tak a hmachhawn a, tûna a hna pawh hi Mizoramah mitdel quota kan nei ve lo va; mahse, dânin a phal a nih avângin a bei fat fat a, office-ah file te ûm zuiin, mi pawimawh tam tak a hmuh hnuin a hna hi a hmu a, ani hi chuan Pathian malsâwmna hi a sualin a sual chhuak tak meuh meuh a ni.

Ka ţhianpa Buata hian khawtlâng leh kohhranah a theihna ang angah chuan rawngbâwl hna thawkin nasa takin a inhmang ve ţhîn a, a mitdelna avânga chhuanlam siamin a in-kil-tawih ve mai lo va. Mizo mai ni lo, vaiho zîngah pawh zâm miah lovin hotu lu ber thlengin a ni thei a ni. Mi tam tak, rualbanlo pawh ni ve hlei lo te, mawhphurhna pawh la ngam lo leh la duh lote tân pawh entâwn tlâk tak a tling a ni.

Ka ţhianpa Buata ang hian beidawng mai lovin kan thiltihna apiangah tumruhna tak tak nei chungin hma i la ve ţheuh ang u.

Wrestler Ropui
THE UNDERTAKER
Lal Isua hnênah a lo kîr
 Ricky L. Colney

Hei zet hi chu mak tih loh a har! Mahse, a tak a ni miau si! WWF a hnu lama WWE tia kan hriat lâ, chuta Wrestler mi ðihbaiawm leh râpthlâk tak, naupan lai phei chuan ramhuaiin chakna a pe ðhîn nia kan hriat, thi thei lo ang maia kan

ngaih, mitthi kal thei (Dead man Walking) an tih ngei mai THE UNDERTAKER-a chuan WWE Hall of Fame Induction ceremony-a lâwm thu a sawinaah a nupui kaltlangin Pathian a fak.

April ni 3, Inrinni 2022-ah khân The Undertaker, a hming tak Mark Calaway-a chu WWE-in Hall of Fame-ah a hming an ziak lût a, ropui takin an

www.mizoramynod.org



chawimawi a ni. Chuta lâwm thu a sawi dân chuan kal khâwmte a barakhaih tak zet! A chhan chu he ramhuai ang maia kan ngaih hian Lal Isua hnêna a kîr leh ni chu a tân ni ropui ber a nih thu a sawi chhuak mauh mai a ni! Under-

taker-a chuan an chhôngkaw chungchâng sawi chhuakin a nupui Michelle McCool chu a fak hle a, a



nupui hi Wrestler hlui ve tho a ni nghe nghe. A nupui leh a fanu te chuan chutia an pa berin dawhsân ațanga lâwm thu a sawi lai chu American Airlines Center Arena ținthlêng ațang chuan an lo thlîr ve reng a, Undertaker-a chuan an nu lam hawi chung chuan, “Ka ngaih dân chuan ka tâna thil ropui ber min tihsak chu ka Lal leh Chhandamtu Lal ISUA kianga min hruai kîr leh hi a ni,” tiin kal khâwmte hriatah a nupui chung a lâwm thu a sawi a ni.

Tân hma pawhin The Undertaker hian Pathian biak in lam hawi zâwnga a nupuiin a hruai dân a lo sawi chhuak tawh a. Nikum mai khân CBN-in an kawmnaah, “Ka nupuiin inkhâwm tûra a ruala min hruai ve țin hma kha chuan ka nun hi a bawrawin Pathian tân chuan nung lo tak ka ni,” a ti a, “Inkhâwm tûra min sâwm ve te hian a tîrah chuan ka duh ngai lo va, a

chhan chu keimah hi ṭha/fel ka inti tâwk a, biak ina inkhâwm kher ngai lovin ṭha ka inti tâwk ṭhîn a ni, chuta chhapah Pastor-in Pathian faka biak ina min hmuh ve chuan engti nge min lo tih ang tih ka hre châk lo a ni,” a ti. A tîr lamah chuan ka



hreh ngar ngar ṭhîn hle a, ka sakhat viau a; mahse, ka han inbeng luh ve tâk râwihah chuan a nuam ka ti chho ta phian mai a, chuta ṭang chuan ka nunin a zawh tîr dik tak lam hawi chuan ka kal leh ṭan ta a ni,” a ti.

Undertaker-a chuan Kristian ṭha famkim a la nih loh thu erawh a sawi a, “Ka la ṭha famkim lo; mahse, chumi lam hawi chuan ka kal mêk a, ṭhat famkimna hmun chu ka thleng ang, tûnah chuan ka hun tam tak hi BIBLE chhiar nân ka hmang tawh a ni,” a ti.

Piansualin Tlai Luat A Nei Lo

R. Lalremsangi

Senior Department, Nursery Veng

Pathian thu chuan engkim in ta a ni a tih avângin vânduaina te, piansualna te hian tu pawh hi min tlâk buak thei reng a. Khawvêl hnam tinten dân ãha leh mawi tam tak an neih angin Mizote pawh hian kan pi leh pute hnên ațanga thurochhiah leh dân ãha tak tak kan nei a, chûng zînga pawimawh leh tûnlai khawvêl thlenga la rin tlâk fo chu ‘Piansual leh pârchârin tlai luat a nei lo’ tih hi a ni âwm e.

Khawvêlin a duh lam hawia min virpui kârah hian mihring hian a rilru leh ngaihtuahna thiang hmangin ke a pên ve zêl a, chûng kârah chuan mahni aia hniam zâwka lang te hmuhsit leh endawng chîng te, ãha bera inngaihna te hian rilru a hruai sual theiin chhiatna zakhua min thlen thei a ni.

Bible-ah hian Isuan tihdam rawngbâwlna hna a thawh chungchâng hmun hrang hrangah kan hmu thliah thluah a. Leviticus 19:14-ah chuan, “Bengngawng chu ânchhia i lawh tûr a ni lo va, mitdel hmaah tlûkna i dah tûr a ni hek lo; amaherawhchu, i Pathian chu i ãh tûr a ni: kei hi Lalpa chu ka ni,” tih ziak a ni a. He Bible châng hian Chiang tak maiin piangsualte hi hmuhsit leh

endawng tûr an nih lohzia leh piangsualte enkawltu leh vêng rengtu Pathian chu mi tinin an ÷ih zâwk tûr a ni tih Chiang takin a târ lang a ni.

Chanchin T̄ha Johana ziaka pian tîrh ata mitdel Isuan a tihdam thua khân Isua zirtîrten mitdel saa piang chu tuin nge thil tîsual tih zawnhna an zâwt a; he an zawnhna zawn hian Isua hun laia khawtlângin piangsualna leh sual hian inzawmna neia an rin dân dik lo tak mai chu a târ lang a. Isuan, “He mi hian a tîsual lo, a nu leh pain an tîsual hek lo; Pathian hnathawh a chung a lanna tûr a nih zâwk hi,” (Johana 9:1-3) tiin a chhâng a.

Ni, vânduaina te leh harsatna te hi pawm thiam harsa hle ÷hîn mah se kan chung a rorêltu Pathian thu lovin eng mah a thleng ngai lo tih rilrua kan vawn reng a pawimawh a ni. K. Hminga'n a hlaa, “Tu nge inthlei thei” a tih ang mai khân vânduaina te leh chhiatna te hi kan thu ni lovin eng tik lai pawha kan chung a lo thleng ve thei a nih avâng zâwk hian mi dang hmusit mai lovin



nun duhawm zâwk, mi dangte tâna malsâwmna nih tum zâwk hi a hluin ringtute tihmâkmawh a ni fo âwm e.

Kâphleian mihring dam rei leh rei loh chu kan kum lam ni lovin kan thil tih lam zâwk a ni a tih ang deuh khân mihringin a m i h r i n g p u i chung a beiseina a siamsak fo hi kan tihmâkmawh a ni a, mahni aia hniam zâwka kan ngaih te hi eng tikah emaw an



aia hniama kan la awm ni a thlen theih avângin tu mah hi inhmusit thei kan awm lo va, Bible-in, “Tu sual pawh sualin thungrûl suh u” a tih angin kan aia tha zâwkin teh vek ila, eng tik niah emaw kan rahbi tleuin kan dinhmun pawh a la phet ve thei tih hria a, mi dang kan la mamawh ve thei a ni tih hre rengin kan nun chu fîmkhur takin, nuam ti tak siin hmang ila, ‘Piansual leh phârchârin tlai luat a nei lo’ tih hre chung zêlin mahni tâwka mi dang tha zâwka ruatin nun duhawm zâwk hman tum theuh ang u.

Tleirâwlte mamawh Krista

Eric Khawlhing, Vaivakawn

Tleirâwlte hian duh leh mamawh kan ngah êm êm a. Kan duh leh mamawh te chu a neih dân kan zawng nasa êm êm a. Kan duh leh mamawh te kan neih theih loh chuan kan rilru a hah thîn hle a ni. Mahse, hêng kan mamawh leh duh te hi a hrang tih hi kan hriat thar a pawimawh hle thung a ni.

Phone leh thawmhnaw thar man to tak tak te hi kan duh a ni mai thei, kan mamawh ber erawh a ni lo. Mamawh chu a lova kan awm theih loh hi a ni, duh chu a tel lo pawha kan awm theih, a awm loh pawh pawl lo hi a ni. Ngaihzâwng hi neih ve duh viau mah ila kan mamawh ber a ni lo. Vawiinah hian ka sawi duh chu Pathianin kan mamawh a hria a, a tel lova kan awm theih lohzia hriain, kan mamawh ber atân Pathianin Isua min pe a. Kan mamawh ber hi hre tûrin Pathianin min duh a ni.

Johana 3:16-ah chuan, “*Pathianin khawvêl a hmangaih êm êm a, chutichuan a Fapa mal neih chhun a pe*” tih kan hmu. Vânin thilpêk min pêk chu kan mamawh ber Isua a ni, a dang min pêk leh chuan tûr a nei lo. Thawmhnaw man to leh mawi chauh hi kan mamawh ber ni se vâh hian showroom-a branded kawr leh thil dangte min pe ang. Mahse, kan mamawh ber a

ni lo tih hi vânin a Chiang Lutuk. Kan mamawh ber a hriat avângin kan mamawh Isua min pe a ni. Lal Isua chuan kan nun theih nân, kan hlim theih nân, kan thlamuan theih nân, kan dam theih nân kan tân a inpe asin! Kan thian ni tûrin a inpe a, hmangaihthu nei tawh lo nia inhriate tân a hmangaihna chu a la ngai reng a, min hmangaih reng asin! Danglam ngai lo Isua a ni asin!

Mihring nun hian kan lâwmna chhandamtu kan hmuh hma loh chuan zawn kan nei a, chu kan zawn chu kan mamawh a ni, mamawh kan nei tlat a ni. Mamawh pakhat chiah kan nei a, chu chu he khawvêl leh khawvêl piah lam thleng pawha kan tâna pawimawh tâwp khâwk Isua hi a ni. Kan mamawh ber Lal Isua Kristaa kan chawlh chiah hian kan nun a kim thîn a, kan nun a thlamuang thîn a, nun hlimna tak tak kan nei thîn a, kan dam chhan dik tak Lal Isua kan hriat hnuah kan nunah danglamna a lo awm thîn.

Tleirâwlten kan mamawh chu Lal Isuaah hian a kim vek a ni. *“Kei atân zawng nun hi Krista a ni”* titute hian an mamawh an hre dik a, Isua ni lo mamawh dang nei nia kan inhriat leh kan zawn hian kan buai thîn zâwk a ni.

Kan mamawh ber Lal Isua bêl ila, a tân kan nun hlân ila, Isua kan neih phawt chuan thil dang chu kan nei ngei ngei ang. *“I awm dân tûr chu LALPA chungah nghat la, amah chu ring la, aman a ti vek ang.”*

Ram Enthlatu

Upa R.L. Thanmawia

Hmânlai hian sumdâwng hausa tak chhûngkaw pakhat hi an awm a, an pa ber chu John W. Smith-a a ni a, a nupui hming chu Cathrine A. Smith-i a ni. Fanu pathum leh fapa pakhat an nei a, an fapa hming chu Samuel Smith-a a ni a, Sam-a tiin an ko thîn a ni.

Sam-a chu a tleirâwl ve tan tihin an sumdâwnna thilah tha zâwk dâwna an rin avângin an chhûngkua chuan America ramah an pêm thla a. Chuvângin, Britain leh America khua leh tui nihna an nei kawp ta nghe nghe a ni. Sam-a chu tlangvâl puitling a nih hnu chuan sumdâwnna lamah MA thleng a zir tawh baw a, a pa hna, sumdâwnna lam thil chu a buaipui ve ta a. A pa chu America-ah a awm a, ani erawh chu Spain ram khawpui, Madrid-ah a awm tam ber a.

Nakinah chuan Spanish nula hmêltha tak nêan an inngaizâwng a, an induh hle a. Chu nula chu Spain ram sawrkâr office pawimawh taka thawk a ni a. Amaherawhchu, a rûka Russia ram enthlatu a lo ni reng a, chu chu Sam-a chuan a hre rêng rêng lo va. A bialnu hna thawhna lam thil a tanpui emaw a tih chu ram enthlâkna lam thu a ni tih leh a hlauhawmzia pawh hre hauh lo chuan thil a lo tihpui thîn a.

Spain sawrkârin an ram thurûk tam tak a pût thîn tih an hriata, an han chhui chian meuh chuan chu nula chu a lo tlan bo daih tawh a. An han chhui zêl

chuan Sam-a chu a mawhphurtu lian tak niin an hre ta a. Tichuan, ram enthlatu manin an man ta a.

Sam-a chuan a tîrah chuan a chhuak leh mai dâwn emaw a ti a, mangan nachâng pawh a hre lo va. Amaherawhchu, a thubuai chu a kal zêl a, a tâwpah chuan pawî khawihna lian tham tak, an ram enthlatauh an puh a, court chuan thiam loh a chantîr ta a. Court sâng lamah an han thlen nawn leh na a, court sâng lam thutlûkna pawh chu a ngai tho a ni a. Sam-a chu thi tûra rêl a ni ta a, tihhlum dân tûrah pawh silaia kah hlum tûra tih a ni a.

Sam-a chu a mangang ta tak zet a. Spain rama Britain ram leh America ram palaite hnênah chuan an ram mi a nih avângin tanpui tûrin lehkha a thawh ta a. A pa pawhin a chhuah theih dân kawng chu a zawng ve reng a; mahse, a tih theih zawng zawng a ti zo tawh a, tûnah chuan a beidawng hul hual tawh a ni ber a.

Britain ram palaite leh America ram palaite lah an reh vung vung si a, a thla a phâng ta hle mai. An kah hlum hun tûr ni chu a lo chhuak ta a. Tûnah chuan beiseina rêng rêng a nei tawh lo. Chu nula a lo tawng kher chu pawî a ti êm êm a; mahse, inchhîr a sâwt tawh bawk si lo. An hausakna sum leh paiin eng mah a ti thei lo va, a thiam thu sawi ve lah chuan awmzia a nei bawk si lo. A mangang chu a huîh pawp pawp a, a ngaihtuahna te chu a buai zo tawh a. Pathian hre lo lêka sum leh pai ringawt a ngaihtuah thin chu a inhmu chhuak a; mahse, a tlai zo ta. Insiam thatna hun a nei tawh si lo, Pathian hnênah erawh chuan ngaihdam dîlin

a ṭap pûr mai a.

Tichuan, chhûn dar 12 a rîk chuan Sam-a chu a tâna aṭang chuan an kai chhuak a, hlau leh zâm tak chungin a kal hngang hngang mai a. Kah hlumna tûr dawhsânah chuan an lâwntîr ta a, a tân beisei a tlêm leh zual ta hle mai. Chutih lâi tak chuan thu thleng danglam tak a awm ta, chu chu eng thu nge ni le? Chu lai hmuna awmte chuan kah hlum tûr Sam-a ni lovin, lo thleng thar lam chu an thlîr ṭhuap mai a. Ram pahnih palaite chu an motor aṭangin an lo chhuk a, an ram puanzar ve ve chu an rawn keng chhuak a, chu chuan Sam-a chu an tuam ta a. Ram palaite chuan, “He tlangvâl hi, kan mi leh sa a ni a, in ngam chuan kâp rawh u le,” an ti a. Sam-a an kah chuan ram ropui pahnih hnam puanzâr chu an kâp chhe dâwn a, Britain leh America sawrkâr-te pawisawi an ni dâwn a, an ngam ang em le? An kâp ngam ta lo va, Sam-a chuan a beiseina a bo vek hnuah thihna a pumpelh a, chhandamin a awm ta. A va lâwm dâwn êm!

Keini pawh hi kan vaiin Sam-a ang hian kan sualte avânga thi tûr, hremhmuna kal tûr kan ni. Chumi lak aṭang chuan min chhandam thei tu mah dang an awm lo. Pathian fapa, Isua Krista chuan min chhandam ta. A thisenin kan sualte a hliah khuh a, a hmangaih nain min kuangkua h a, chhandamin kan awm ta a ni. A va lâwmawm êm!



Naupang tête chhandamna thu hritlu an ni thei

Madawnga

Ni khat chu doctor pakhat hi a hnathawhna ațangin ngui takin a lo haw a. A nupui chuan an pa hmêl ațang chuan thil dik lo eng emaw awm nia ringin a zâwt a. Doctor chuan, “Kan hospital-ah naupang kum 10 mi enkawl tûrin a lo kal a. Chu naupang chuan ‘Doctor vawiin hi ka birthday a ni a, kum 11 ka tling chiah dâwn a. Mahse, thih ka hlau tawh lo va, hrehawm tihna pakhat erawh ka nei. Isua Krista lal leh chhandamtu atâna ka pawm hnu khân thlarau bo sâwm ka chhan chhuak tawh a, kum sawm pakhat ka nih hnuah thlarau bo ka chhan chhuak tawh lo tûr hi ka hrehawm tihna chu a ni a ti a, chu naupang thu sawi chuan ka rilru a khawih tak zet a ni,” a ti a.

Chutih mêk lai chuan chu naupang tê chu a boral ta tih thu an rawn hrih a. Doctor chu a tlân lêt a, a va thlen chuan an nurse pakhat chu a lo țap nasa mai a. Doctor chuan “Engati nge i țah?” a ti a. Nurse chuan, “Ka jection dâwn a; mahse, naupang tê hian, ‘Min jection duh lo mai rawh, ka Lalpa hmuh ka châk tawh em mai’ a ti a. Chumi zawh chuan ‘sister chutah chuan ka hmu ve thei che ang em?’ min ti a, Chutichuan, he naupangin a chhan chhuah sâwm pakhatna ni tûrin Lal Isua chu ka pawm ve ta a ni,” a ti a. Doctor chu a ngawi vang vang a, lungchhe taka mittui parawl țeuh chungin, “Kei a sâwm pahnihna ka nie” a ti a. An pahnih chuan naupang ruang chungah chuan Lalpa hnênah an inhlân ta a.



Vaivakawn Kohhran, Naupang (CWC) leh Tleirâwl (YWC) Inkhâwm

Vaivakâwn Kohhran Committee chuan Sunday School Naupangte pualin Children With Christ (CWC) leh Youth With Christ (YWC) a din a. Children With Christ-ah hian Beginner, Primary leh Junior Department-te an awm a, Youth With Christ-ah hian Intermediate, Sacrament leh Senior Department-te an awm a ni.

Youth With Christ (YWC): Youth With Christ hi kum 2004-a din niin member-ah hian Intermediate, Sacrament leh Senior Department-te an awm thung. A din ni aţanga kum 2023 thleng hian Youth With Christ (YWC) rawngbâwlna hi châwl lovin a la kal zêl a ni. Intermediate, Sacrament leh Senior Department zirtîrtu zawng zawngte YWC zirtîrtu an ni nghâl vek a. Office Bearers leh Committee Member-te Sunday School Committee-in a ruat ţhîn a ni.

Youth With Christ-te hi Pathianni chawhnuah an inkhâwm ţhîn a. Member-te group-ah inţhenin, sports neih ţhin a ni a, group hrang hrangte indoor leh outdoor items chi hrang hrang hmangin intihsiakna an nei ţhîn. Youth With Christ inkhâwmah hian naupangten tisa leh thlarau lama an hlâwkpu theih tûr programme siamin, zai thiam, zirna, eizawna leh infiamna lama mi hmingtha, Pathian ringtu ţha tak ni bawk te sâwm ţhin

an ni. Kohhran dang naupang chawhnu inkhâwm te nêh pawh Joint Service an nei thîn a ni.

Kum 2023-ah pawh inkhâwm pangngai bâkah

HIV/AIDS

Awareness

Campaign,

Literature

Campaign leh

Class X &

Class XII result

chhuah hlimin

“Kristianna leh

Career Guidance” tih thupui hman tein special

programme hman a ni a. Hêng hunah hian an thupui

mil ang zêla thusawi thei tûr mi thiam an sâwm a. YWC

Sports, Drugs Awareness Campaign, Talent Hunt leh

naupangte thlarau lam nun than lenna mai bâkah an

theihna pho chhuak lam hawi programme siam tum a

ni bawk.



YWC aţanga ţha taka inkhâwm thîn te KṚP-ah

pawh nuam ti taka inhmang chho zingah an thahnemin

KṚP member nghet insiamna atân ţangkai taka hman a

ni bawk.

Children with Christ (CWC): CWC hi kum

2007 khân din a ni a, Beginner dept. aţanga Junior

Dept. inkâr naupang chawhnu inkhâwm thîn a ni. A

din tih aţang hian Music Video’ “ṚHIAN LALISUA”

tih chu siam a ni tawh a, tûn thlang hian Pathian

kaihhruainain tuang takin an la inkhâwm thei zêl a ni.

CWC-te hian inkhâwm programme-ah thusawi, hla zir, games, movie show leh programme chi hrang hranga hun hman thin a ni a, kohhran inkhâwmah hla rem thin a ni bawk.

Kum tin group paliah inthenin sports neihpui thin an ni a, a remchân dân angin outing neihpui thin an ni bawk. Chawhnu



inkhâwmah hian naupang attendance pângngai taka lâk thin niin, kum tâwp CWC inkhâwm kim lâwmman pêk thin an ni a, Pathianin hrisêlna a pe a, mi eng emaw zât an kal kim thei thin a, a lâwmawm tak zet zet a ni.

Kum tin Naupang Sunday School Committee chuan CWC hrulaitu tûr an ruat thin a, Beginner dept aţanga Junior Dept. Sunday School zirtûrtute hi an ni nghâl a, Biak Inpui lama inkhâwm duh zâwk an awm a nih chuan an inhre thiam thin a, a hranpain zirtûrtu hran ruat an ni lo.


YWC leh CWC te pual hian kohhran chuan a hranin sum hman tûr a dah lo va, Sunday School Committee kaltlangin an mamawh leh an rawngbâwlina atâna tûl leh pawimawh hrang hrangte ngaihtuhsak thin an ni.



Hriatzauna Huang

Jet Engine


Jet fighter thlâwk chak tak tak te thlawhtîr tûra nawr kalu engine hi mahni kutkawiha siam thei ram hi 10 pawh an la tling âwm lo ve. Jet fighter te hian Turbojet leh Turbofan engine an hmang hlawm a, Turbojet hi a chhuak hmasa a, tûnlaia an hman ber erawh chu Turbofan engine a ni. A hnathawh dân kalhmang chu a inang deuh reng. Turbojet - a h chuan air intake aţangin air chue engine - a h thlawhna speed tluk चाहin a lût a ni.



Engine-ah chuan stage hmasa berah diffuser a awm a, a hna chu air lût speed chak lutuk tihmuan a ni, engine chhûnga airflow muang deuh hi duhthusâm zâwk a ni. Diffuser-in pawm theih china muanga air a siam tawh chu compressor stage-ah a lût a, hetah hian axial compressor puinhnain nasa taka mokin a siam leh phawt a. Chuta aţang chuan air chu combustion chamber-ah kâp lûtin fuel kah luh nêna a kâng ta chiam thîn a. Hei hian nawrna nasa tak leh

temperature sa tak a siam hian turbine blade nawr virin compressor a va khawih lêt leh chuan air tam zâwk a dawlh luhtîr leh thîn. Turbine hi generator unit nên inkawpin thlawhnaa electric tha pe chhuaktu an ni bawk. Turbine aţanga gas chhuak chu puam lian vakin exit nozzle-ah na takin a tleh chhuak a, hei hian hma lamah nawrna siamin Newton's third

law zulzuiin thlawhna rit tak tak a nawr kal ta pur pur thîn a ni. Tichuan thenkhat chuan afterburner a la nei a, turbine



aţanga gas alh chhuak laiah tak fuel an kah luh chu nasa taka kan belh lehin nawrna na zâwk leh boruak sa zâwk a siam belh a, thlawhna a chak sawt thîn. Mahse, fuel a hek duh êm êm a, minute 2-3 vêl bâk an hmang duh ngai lo va, hman rei chuan nozzle-in a tuar bawk.

Kan sawi tak hi Turbojet kalphung a ni a, Turbofan-ah chuan diffuser hmaah fan an dah a, boruak chak zâwka a hap luh zînga thenkhat chu turbojet-a lût lovin nozzle-ah a chhuak leh mai a, chu chuan thrust eng emaw chen a pek belh a ni. Hei hi kan hriat thiam tlân leh sawi thiam dân awlsam ber a ni âwm e.



Mihring nunah hian hma lam hun kal zêl tûr inruahman that hi a pawimawh hle a. Hma lam hun atâna inbuatsaihna nei tha leh tha lote chu an zirlaiah leh an nun dânah nasa takin danglamna a awm thîn.

Tûnlai hian zirlai tam tak zîngah hma lam hun atâna inbuatsaihna tha nei thiam lo leh neih nachâng hre lo kan tam hle tih ka hmu nual mai a, a pawî ka ti hle mai. Mi tam tak chuan an hun tha neih te tângkai tak leh awmze nei zâwkin an hmang lo bawk a. A pawî hle a ni.

Keini hian kan hun neih that te hi hman that kan zir a tûl tak zet a ni. HSLC leh HSSLC result a chhuak a, hma lam hun atâna kal dân tûr inbuatsaih tam tak kan awm mêk. Hemi hun lai

aţanga kum sarîh vêl hun kan hman dân hian kan dam chhûng hun hman dân tûr a hril dân. Kum that kum sarîh chhûng taima taka kan zira, kan zirlaia kan in 'focus' chuan nihna tha leh sâng tak kan dam chhûng a ni thei a, hemi hun chhûng nawm kan hmasak chuan dam chhûng a nghawng thei. Tu tân pawh kan tûn hun zêl kan hman hian kan nakin hun a nghawng dân avângin kan 'kum that kum' te hi hlâwk taka hman kan zir a ngai a ni.






Bible hmanga chhân tûr zawhna kan rawn dah leh ta. Eng zât nge kan chhân theih i han enchhin teh ang u aw:

1. Solomona nu hming eng nge ni?
2. Solomona lal atâna hriak thih tu kha tu nge?
3. Juda-ten ni eng zât nge inneihna an lawm thin?
4. Kana khuaa inneiten eng nge an tlâkchham?
5. Estheri enkawltu kha tu nge a nih?
6. Josia hming awmzia eng nge ni?
7. Jehosaphata hming awmzia eng nge ni?
8. Debori thawhpui sipai huaisen kha tu nge?
9. Jephtha kha kum eng zât nge rorêltuah a tan?
10. Gideona hming awmzia kha eng nge ni?

1. Bath-sebi; 2. Zadoka; 3. Ni 7
 4. Uain; 5. Mordekakia; 6. Pathiamin a tanpu;
 7. Lalpan ro a rel; 8. Baraka; 9. Kum 6; 10. Kit thlutu




CHEI RAWH LE!



- | | |
|-----------|------------|
| 1 = Brown | 4 = Yellow |
| 2 = Grey | 5 = Orange |
| 3 = Blue | |

KA HMUH ANG HMU THEI RAWH



A chung a lemziak chi hnih khi ngun takin en la, a inan lohna chi ruk hmu thei rawh.

A hnuaiah hian a chhanna lo ziaak la:

1.
2.
3.
4.
5.
6.



Vaivakawn Kohhran CWC Zirtirtute leh Editor



Vaivakawn Kohhran YWC Zirtirtute leh Joint Editor

To



**CHILDREN
WITH
CHRIST**
**Vaivakawn
Kohhran**



Published by Rev. Lalbiaknia
Synod Literature & Publication Board, Aizawl and
Printed at the Synod Press, Mission Vêng, Aizawl - 796001. Copies - 32,500